

U fantasmë d'u cummëntë

Cë štéva na vóta nu crištijanë chë ténévë na mórra dë figlië. ‘Št’óme iva arrangiannë la jurnata mò da unë e mò da n’autë pë cërcà dë sfamà la famiglia.

Capëtattë ca quištë rëmanëttë pë paricchië tiémpë sènza fatija e n’ sapéa cchiù cummë fa.

Lë figlië ténévënë na famë ca pë pochë ‘nzë magnavënë l’unë kë l’autë.

Vicinë a la casa so’, ci abbëtava n’autu povërë crištijanë, pur’issë chë na carrëtta dë figlië e pur’issë c’u problémë dë cummë fa pë sfamà lë ddurrëcë figlië suo’.

Évënë arrëvatë quascë a u štrémë dë lë forzë, quannë va ‘štu tizië e dicë a u cumparë suo’: cumpà hajë fattë na pënzata, addusërëmë: Iérë passannë p’u Cummëntë hajë vištë n’uortë chinë chinë ‘é caulë a cappuccë, sa chë vulémë fa...tu puortë nu parë ‘é sacchë, ijë më mmënë nu lënzuelë ‘ncuollë e më méttë a cantà cummë së fussë nu spirëtë dannatë, ‘ntromëntë tu rëjgnë lë sacchë dë cappuccë..

La propošta piacëttë a u cumparë e la séra doppë, vèrzë u tardë, zë në vannë all’uortë d’u Cummëntë.

U cumparë chë tenëa ddurrëcë figlië, zë mmënattë ‘ncapë u lënzuelë ghianchë e ‘ncumènzattë a cantà kë na vocia chë facëa paura tantë da fa accappunà la pèllë:

“ Quando évo vivo ijë, passiggiavë pë ‘štu ciardinë... e mò ché songo morto, passeggio pë quišt’orto...Finchè nën trovo pacé qua më në voglio štarë a camminare...”e u secondë cumparë tagliavë lë caulë a cappuccë e lë ‘nzaccavë rént’u sacchë.

Rént’a u cummëntë cë štëanë quattë muónëcë, trë vicchiariéllë e unë cchiù giovënë chë éva fratë cërcatóre. ‘Štu fratiéllë sëntennë ‘štë vocë curretë a chiamà u patrë guardianë.

U guardianë sëntë ‘štu cantë e zë méttë pur’issë paura. Allora dicettë a lë fratiéllë, jamë rént’a la cappëlla e mettémëcë a prijà accusì l’anëma dannata z’acquiéta.

U cumparë chë facëa u fantasmë cantavë sèmpë kë cchiù forza e lë muonëcë zë mëttëanë ancora cchiù paura e prijavënë kë chiù sëntëmiéntë.

Quannë fënënnë ‘e rëégnë lë ddù sacchë, u cumpare fantasmë facettë avvijà prima a u cumpariéllë kë lë sacchë e po’, cantannë cantannë issë z’avvijattë vèrzë u récintë dëll’uortë, scavalcattë la fënza e, tutt’e ddù, zë në scappannë.

La matina appriéssë ‘štë ddù cumparë zë jënnë a vénne lë caulë a cappuccë a u paésë vicinë e ‘ccusì putënnë fa magnà purë lórë a lë figlië .

Lè muonēcë cummë z'auzannë jènnë a vèrè sé u fantasmë éva lassatë cacché ségnë: Atë e che ségnë, éva lassatë u fantasmë!... Z'éva rëpulitë miézë campë 'é caulë a cappuccë!!!

Mò u munachiellë chiù giovënë dicëa a u guardianë dë chiamà lë carbuniérë, ma l'autë muonēcë dicènnë a u guardianë: Patrë Guardia', chi sa chi puvëraccë éva quissë, lassamë šta, tantë s'avéssa rëmëni, mò nu' sapémë u fattë e lë rémë na bona lezióna.

U 'uardianë apprëzzattë u judicië d'u cchiù anzianë dë lë fratiellë e accusi lë povërë muonēcë, zittë e muscë, cë mëttennë na preta 'ncoppa.